

四庫全書

集部

欽定四庫全書

集部
宇溪集卷九

詳校官庶吉士臣初喬齡

主事臣呂雲棟覆勘

謄錄監生臣南光賦

欽定四庫全書

字溪集卷九

宋陽枋撰

雜著

辨惑

俗言三世仕宦方會著衣喫飯余謂三世仕宦子孫必是奢侈享用之極衣不肯著布縷紬絹衲縕敝澣濯補綻之服必要綺羅綾縠絞綃靡麗新鮮華粲絺繒繪畫時樣竒巧珍貴殊異務以誇俗而勝人食不肯疏食

菜羹粗糲豆麥黍稷菲薄清淡必欲精鑿稻粱三蒸九折鮮白軟媚肉必要珍羞嘉旨膾炙蒸炮爽口快意水陸之品人為之巧鏤篋雕盤方丈羅列此所謂會著衣喫飯也殊不知極盛者極衰之證奢華者寥落之基豐腆者貧薄之由富庶者困苦之自蓋子孫不學而顛蒙窮奢極靡惟口體是供無德以將之其衰必矣 俗言某人甚了辦余謂了辦甚害事夫了辦而不惟上之人旨意私徇是從不害民不任己不任性不倚勢不作威

而了事辦事固是賢材實能常見今之所謂了辦只是
一切不顧不問是非不識道理以勢力驅迫刑威捶楚
暴虐殘忍取快目睫如此了辦是為鬼為蜮豺狼邪魔
之謂也上之人從而稱賞任用之終亦必亡而已矣

俗言某人甚圓余謂圓熟不如鯁介之人圓熟乃是無
是無非無可無否同流合污鄉原之徒此等阿媚容悅
竊富貴盜聲名無益於國家之盛衰存亡今所謂和鑼
槌者是也亦癩疣而已矣 俗言今時幼小童兒甚靈

例余謂今時風氣愈覺漓薄全無前輩敦龐淳厚氣象
小兒機巧滑稽變詐欺偽莫此為甚要其成就不過為
奇變小人之歸決無孝悌忠信之行父母愛之舉世稱
之惑亦甚哉 俗言今時某人是學者余謂學道通今
達古識義理識是非得聖賢之心法會物我之歸趨剛
方練歷惟天理是行雖不博覽古今該貫百家却是學
者蓋學者是用之則行舍之則藏生死富貴貧賤患難
不足以易其守者也若夫自恃強記淹該胷中稍稍過

人便揚揚自肆以為經庫書匱傲視一世輕忽慢罵開口嘵嘵誦數千萬言以驚駭誇耀中等以下之人此已失之本心務悅於外不足以為學矣世人又從而誇美稱譽之學而止此可哀也已 俗言某人迂闊古椎余謂迂闊古椎正是好處易稱遜世無悶不見是而無悶孟子言人知之亦囂囂人不知亦囂囂孔子生於春秋未嘗不浮雲不義之富貴孟子生於戰國未嘗舍仁義以徇權謀孔孟豈不甚迂闊而太古椎哉人生斯世寧

使人稱迂闊不可使人說軟媚寧使人道古雖不可使人道利器何往而不得我心哉 趙清獻公每夜焚香具晨夕與人言及所奏事所為事以告天人問之曰苟欺於心則覲於語其敢告上帝乎看來只是自謹自持是初學的事日日告天不幾於褻天只在面前作事是時天自知了 范文正遇夜就寢即自計一日飲食奉養之費及一日所為事相稱則鼾睡熟寢否則終夕不安明日必求所以稱之余謂一日奉養只以恭儉為本

不必計事稱不稱若做得十分好事飲食奉養元只儉約若無事可做則儉節亦無害先正有作座右銘云避色如避讎避風如避箭莫喫空心茶少餐中夜飯色與風如何避得只是自家謹審保守便得空心茶中夜飯當喫則喫不可為常酒誡云少喫不濟事多喫濟甚事有事壞了事無事却生事此只好與下材之人言中人以上便說不得呂滎陽言伯祖行父題壁云但畏賢人之議論不顧小人之是非賢人議論自是當畏

小人是非亦豈全不顧得他亦有時說得是當天下事
只管是我做教是合道理便好賢人小人外面說話
康節先生詩云平生不作皺眉事到處應無切齒人
此近仙釋言語聖人治天下須有慶賞刑威若無一點
皺眉的事有甚分曉此語是康節自說他自己初不以
訓俗今人自體認之方好 劉器之云有盛待制名濤
者常有一語云士大夫行己正如室女常置身法度中
不可受人指點猛看似好然女子當終身在法度中行

豈但室女為然恐人不察便道從人了可以舍法度則
大害理 本朝先正說喫得三斗醞醋方做得宰相蓋
言忍受得事然末節細故則自是當忍若事關大利害
如何用得包荒只是時下包涵不容淺露其實投機應
變間不容髮古人云皮裏春秋便是外面寬和而中則
別白不然是一個和鑼槌持祿保位伴食宰相何益於
人國哉 山谷先生言男女婚嫁緣渠墮地自有衣食
分際今人終日蹙眉為百草憂春雨耳青山白雲江湖

湛然何有不足之嘆耶余謂終日蹙眉固不是但人倫中君臣了便是父子若不盡倫何以為人父父子主恩為人父者當止於慈教之誨之養之鞠之長則為之擇配凡所謂恩與慈者亦無所不用其至只是不可悖理傷道貪黷貨財以愚子孫諺所謂不為兒孫作馬牛者是矣不是都管他也父母於兒女無恩慈却要兒女盡孝敬有是理乎山谷之語近佛老矣 余讀蕭何置田宅必居窮僻處常曰後世賢師吾儉不賢無為世家所

奪人皆以為善余謂田宅恁其得之自然何必居窮僻處子孫當遺之以孫謀義方賢則良田美宅亦自可保若不賢則窮僻瘠鹵亦不能一朝居豈能無為人所奪乎 陳瑩中子姪勝柔常出瑩中詩示人云仁者難逢思有常平居謹勿恃何妨爭先世路機關惡近厚語言滋味長可口物多終作疾快心事過必為傷與其病後求良藥不若病前能自防此言甚當理 康節言好善詩云若求騏驥方乘馬只恐終身無馬騎甚切當便是

見善如不及的學力 寧可負人無人負我此曹操語也害多少事晉記麴粥說羅仇勒兵向西平仇曰誠如汝言然吾家世以忠義著於西土寧使人負我我不忍負人也滎陽公呂原明云中年嘗書壁以自警寧人負我我不負人 呂正獻公常薦常夷甫夷甫後老改節呂對程伯淳有悔薦之意伯淳曰願侍郎寧可受人欺不可使好賢之心少替余謂明道此言極忠厚長者陳希夷先生有云得便宜處落便宜康節先生云落便

宜處是便宜余謂康節語不若希夷之寓誠然便宜字亦不必說 晁氏客語云人受天地之中以生當與天地齊畢天地未嘗老而人自老余謂人自老之言當理而當與天地齊畢則非也 性善先生歎乃孫服之華楚乃引懷中短布衫示諸生曰吾法從儉約不敢自足常教他們等你地步到那富貴處享亦不妨今便如此是自滿也某謂若到自己合當得的富貴處亦須節儉不可享用太過 身安而天下國家可保夫身者家與

國之本古之君子所以愛其身者非私於己而忘斯世也身之安危關天下之休戚安其身者正所以安天下國家也天下之理亂有天焉有人焉孔孟之於天下固未嘗一日不切切焉不扶持人極而至於道之不行則必歸之於命蓋既盡其在我而莫如之何者天也聖賢於此不過仕止久速當其可以合乎道而已 見善明用心剛余謂惟明故能剛不剛本於不明 今時雖有用君子之名而無用君子之實苟用之只在用得着與

用不着耳晦翁論漢武若使董仲舒為相汲黯為御史大夫世上那有此差遣何道夫訓子文合下兩句云禮三拜佛誦一卷經便差了又次言禁私慾止行利益事度性善言作利益事不是私慾莫如何富貴則業力滋侈貧賤則邪魂不干如此則便是乞丐人時則鬼不近也性善言女壯勿用取女只是言陰陽之理如此然今人取婦亦須是採擇方得余謂前賢有言人皆知擇婿而不知擇婦婿易見而婦難知女子處深閨之中

其性情果難察也只是不可倉卒須是訪問審詳盡其道至入門而不賢亦天也或云婦教初來須是隄防訓誨使不至於壯余謂女壯是其氣質稟得如此雖訓誨往往亦難變全菴云相其父母亦自見得性善云世蓋有父母賢而子女不肖的有父母不好而子女賢的也難執着善父無賢子善姑無賢婦善師無賢弟善主無賢奴所謂善非美善也懦而已矣適足以長惡或亦有賢者其幸乎義理之間即君子小人界限不爭多

只些子間便是天淵之判別了 如今人只箇箇要學
時樣以求容悅吾人幼學壯行到此處量宜造事見可
知難勿失良心可也時樣不必盡學有不得已則求與
畧相似而無慊於心足矣 孝子用心誰不有之奈何
今時學非古學古道遽亡今之孝者是謂能養便自以
為極至世所無矣舉世亦皆以為某人極孝衆人莫不
敬嘆尊仰而稱譽之是以人子之心便自慰足滿假施
於德色若能拔乎流俗斯可謂之孝矣 河南遺書載

狄仁傑盡廢淫祀而伍子胥廟不廢只道為駭俗公批云不是駭俗只為擔不下炎殍因問文公不謁五通是夜忽暴瀉一家便驚文公曰莫枉了五通人心只為禍福二字怵之所以做不得事公曰便是如此伍子胥鞭其君之屍申包胥以為無天道之極如何祀之而不廢今人趨向正學者皆非議之間有志於此者却被世俗議便中輟元是立志不定天下事惟患見不透行不力終日被世俗常情牽纏迷惑所以去聖賢之心愈遠

夫子謂如不可求從吾所好夫子所好必有大於富貴
利達者但言不可求則亦有可求之理盡心倫分使俯
仰無怍動合理道便是夫子求處然其施為注措之時
亦無所謂求之之心只是合當如此而已 答誼儒姪
曰書來言已為前姪婦修塋議葬此事是矣胡為又以
巫師之言而輟所謂穿壙而隣家災亦偶然耳况糴事
追呼乃官司常行初不是來追呼如何脩墳不修則官
司不問米事邪東家懲羹西家吹虀亦一段可笑而又

因以成九流淺薄者之說此所以嘆道之不明道之不
行也中庸只在眼前竟難着脚姪不容不加勉乾健也
健而不息之謂乾姪於此柔而息矣君子自強不息姪
於此不自強矣剛者伸於萬物之上姪於此屈於萬物
之下矣吾儒之學只道理是時夕死亦可何凶咎憂虞
之足云哉聞為親戚而姑已則猶得坤順意思文公所
謂無硬的天理差相似但世人信風水之言而久暴其
所當藏之骨者無以折之君子擔當主持天理之任這

便是難往事已矣後更謹之

社稷祈雨祝文

代趙廣字

粵自去冬戎馬踐襲此邦之民存三之一代庖肆虐橫
政百出本根傷殘膚髓槌瀝芽蘖僅生驕陽爍石千里
焦枯寸苗不入天之殄民奚至此極嗚呼何辜今之人
旱既太甚寧丁我身茲長吏之責毋害我田穉益之以
霖霖既霑既足生我百穀實惟社稷

祭文昌祝文

坤文炳靈神生西蜀濟濟多士居焉司祿有儒衣冠莫
不恭肅時維仲春典祀不黷酒醑潔清蕭蘭郁馥衿佩
濟蹌觴俎離陸升降周旋齊明盛服著于外心擎跽拳
曲誠意正心念念謹獨孝弟溫良忠信輯睦踐實履真
黽勉勤篤種學績文晝牕夜燭盡此內心神其來福洋
洋在上歆此誠告

雷神祝文

雷雨之動滿盈物之所以屯也天地解而雷雨作百果

草木之所以甲拆也此邦自三月不雨至于夏四月苗不入土如慳如焚遍走羣望終焉密雲斯人何辜罪在官臣痛自省責冀神聽聞豐隆鞭車兮搖電幟畢宿駕虯兮御雲氣沛晉之霖於目前庶稿苗猶可興而農尚可濟潔粢豐盛以享以登神亦無所不利焉

寓龜陵告四殿尊神祝文

某生於神鄉長於神國蒙神之休感神之德循理安貧永惟報賽蜀有敵難流離異鄉八年荆楚仗神庥祥聚

指食息以壽以康季男濫恩乘障珍南千里挈家牽舟
沂江寸心隱憂寢食不遑行次龜陵敬辦片香虔修祀
事仰答鴻龐得假餘息恩斯不忘

觀音殿祈晴文

黃間石田喜麥秋之在望晴連巫峽憂梅雨之踰時惕
息熏爐凌兢請祐冀大造仁心之感憫小邦粒食之艱
倏爾開晴麗東方之日出居然刈熟卷南畝之雲連亟
荷垂休敢忘報德

大寧諸廟祝文

代趙守

寧俗近鹽人惟利薰有來漁獵智巧紛爭一經蹂踐戶
口凋零邦雖號富編民食貧某貿然負乘昕夕凌兢公
以蒞事廉以持身嚴以束吏寬以紓民邪枉必戢冤滯
必伸知過則遷聞善則行顧力所至惟材所能冀無負
大闡愛護根本之盛心而戢寧此邦之人神其相予此
忱

祝文

某尋師逐食六過瞿唐跪起靈祠旅薦芬薌黔嶺掾學
羞蝗太倉陶情翰思萼肥菊荒成滿投幘巾車故鄉子
季仕夔千里趨旁告以君祿斗升共嘗罷種杞菊復謀
稻梁攜壯挈穉龍山之陽顧瞻明神在上洋洋律修菲
祀飭體之常歲脫疲荅命子潔觴聚指逾百託蔭依光
四序推遷洪雲高張恩斯勤斯何日而忘

峽州紫陽十先生祠堂祝文

顏魯公真卿歐陽公修字永叔元城

先生劉安世老泉先生洵東坡先生軾穎濱先生
轍伊川先生頤正公山谷先生庭堅字魯直

兼山先生郭忠孝伊川門人
願正先生郭白雲兼山之子

天運間氣鍾英炳靈魯公精忠昭揭日星歐公肅哲月
霽西陵稟姿貞固令譽元城旅處懷資所存者神蘇擅
儒宗文章天下正公道學太史善價咳唾珠璣輝華次
舍萬古不磨所過者化兼山白雲妙窮義畫先天後天
布在方冊伊傅發揮坦然明白玉韞珠藏神返其宅猗
與休哉道無存亡流行斯世仁見謂仁智見謂智忠質
詞華剛健純粹殊途同歸百慮一致皎皎流風千古江

山紫陽新祠卧雲扁顏覩象懷人炳然如丹妥佑此邦
接武衣冠

涪州北巖秋祀祝文

竊惟文拘興彖箕繫述疇繫明返魯傳成遷涪大聖真
賢今古同流易傳發揮義文孔周浩蕩汪洋乾坤與侔
淑人無窮綿祀千秋

伊川

孔子之道以魯而聞伊川之學由鈍而傳自保終身顧
行顧言逃偽之什嗣之之文三畏六有景行高山宥饗

正公純乎淵源

和靖

惟公生而好易聞道實早審業從程研極幽眇見乃謂
象卦爻斯了出處行藏淵乎近道牧唱漁歌非釋非老

宥饗斯堂源流有考

達微

鈞深二字深知伊川而作也深知伊川則深知易矣濂
溪之心以光霽而明伊川之易以鈞深而顯兩言精微

千載祀典

山谷

問易考亭得易涪鄉見知聞知融明寸方易由先生而

有傳巖因先生而有光道晦而明名久而彰從祀四賢

無愧茲堂

晏蓮
蕩

又晏蓮蕩祝文

某仰惟先生寧宗朝毅然志道萬里尋師閱三年而後
聞易於考亭以歸十有餘年至於戊子而先生之學始
傳又二十有餘年至淳祐庚戌從祀於北巖而先生之
學始顯甚矣道之難聞而難行也凡人未見聖若不克
見既見聖亦不克由聖古之聖賢其道不見信於當時

而終必行於後世者窮達之勢使之也何患焉某解官
黔南絕意仕進將欲涵詠先生之道以怡老遺世而涪
守李使君力命主堂長事既謁北巖之祠又拜於蓮蕩
之塋平山蒼蒼渠水洋洋忽後瞻前月霽風光靈爽在
茲歆此一觴

庚子奏名謁三神文

惟神聰明正直依人而行不惑之謂聰不蔽之謂明不
偏之謂正不曲之謂直某幼聞此於師壯學此於身行

將筮仕期以此及於民神其依之

祭水府文

伏以淵淵浩浩潤萬物而先五行混混湯湯納百川而
放四海功用如此真靈職之既藏垢而納污宜澡身而
浴德潔己以進咸與惟新恭惟云云品列于三數主于
一獨妙淵深之德難名滌濯之功有難即除無厄不解
輒伸孝志仰叩真聽伏望河海其容涓流不卻俯察寬
哀之懇廣開解脫之門後呪前陳一洗積年之濁先魂

近識均淘此日之清不滯源泉同登彼岸

祭鼐三弟貢元堂長文

顧惟同胞鼎之三足長兄不幸早世惟某與弟形影相依從師問學夙夜勤瘁勉嗣前烈某庚子叨第老不欲仕弟猶奮發隻身南遊期於有成歸光儒門此弟之志也既薦不第夷猶東南於焉久留豈弟之心哉丁未之夏某送子入對胥會西湖之上吟風弄月怡愉對床不勝其樂弟勸兄留兄勸弟返不能相謀東西各別脉脉

臨岐曷勝嗚咽鴈影一分萬里魂絕十書九不到何以
為懷哉成都別時弟許甲寅西歸癸丑收書又復愆期
約遊南岳某日夜相望冀一相見聚首商畧避世優游
遺老今年春鄉先達有召對者某丁寧修書約與弟會
豈謂弟已於去年仲夏不救嗚呼痛哉兒輩已久聞喪
遇某病不以告禮制哭泣於是有缺甫衰麻三十日而
奄及小祥手足之義大有不滿可勝痛哉稅喪有禮我
不敢廢某未第食貧不能留弟於蜀既仕祿薄不能迎

弟子南使弟流落萬里辛勤而歿生不得相養病不得相救死不得斂衾喪不得盡制某之罪也終身之痛其有窮乎弟自幼能悅親事長事先妣極孝敬某與兄姊皆不逮也先妣鍾愛無晷刻不念弟此事可以格天地而通神明加之勉勉勤勤尋賢師友德行文學世罕其匹兄謂弟必膺五福而止乎是真可悼也一孀二孤已命男少箕炎卯專遣人往撫州迎接歸川侍奉教養某未即死尚能顧比俾克成立以慰弟志弟之著述亦囑

姪損收藏歸川以圖刊傳九原庶無憾也弟疇昔謂魂
氣則無不之兄聊奠一觴以寫誠篤昭明有融髣髴來
歆

祭趙景賢使君文

汝廩

何其乎蒼蒼哲人萎兮邦之良期德業之久大慨修短
其無常仁不必壽德不必昌深培何係乎完久邁種豈
偕乎綿長襟春風兮芳辰早歇稟厚氣兮急景飄揚展
也視履嗟乎考祥使樂善之日沮而悖德之滋狂闕風

俗兮盛衰係正理兮行藏公止於此云胡不傷公資稟
高明才華卓出好語開口妙句落筆貫百家而剖析飽
信史而涉歷齊漢儒兮不羣輩謫仙兮俊逸厭華摘實
反求六籍詠詩之性情用禮之文質語孟觀其會通典
謨究其精一既又即日用常行而參之於易戰野於銅
峽之遇敵設險於渝江之城壁秀屏禦寇兮擊蒙昌溪
井收兮勿幕涪會廣振民之惠黔嶺公施溥之溢歲晚
兮理益明官窮兮志愈立公於易蓋自得之力行之非

但言辭綴葺而已也惓惓心期約予歲寒方欲講大有之盛進匪躬之言明得興之義贊碩果之全期公以美在其中發於事業而膺黃裳之元公今已矣予又奚言嗚呼善政時事也興學任職也社粟方惠也叢塚漏澤也殆公之善者幾也北山維麓渠渠巖瞻輪焉奐焉實光於前熏山谷之香嗣蓮蕩之賢揚紫陽之帖彰樂活之傳山高矗天江流成淵公之心與伊川之易皦如萬古之長存嗚呼哀哉公其歆旃

祭王隆州敬伯文

諱謹禮

惟公金華毓秀婺水鍾英接東萊之風而遠乎儕輩聞
晦翁之學於潘李諸賢而慕其為人歷時態之既久閱
世故之已深有事可武無事可文寘彼周行優於撥繁
而治劇守固邊圉毅然排難而解紛明足投機變於一
髮剛足任重寄於千鈞擊通秦之孤柱息唐鄧之塵氛
躡之武而前躅邁夷吾而比肩念西陲之急材慨然登
蜀道之難歷埋安流戍雪黔巒嚴以束吏廉以持身儉

以足用寬以愛民勸其強梗之害伸其柔弱之情儉巧
遠罪而服其斷悍敵畏威而敬其明民俗熙其與與士
風郁乎彬彬惟其主於中者定所以閱二載而四境之
內民和物阜而長春顧某父子辱知最深始排浮議而
察其無他終乎實意雖金石莫喻其堅凝期弭蓋於長
江俾聲迹言論時得以相聞公未解維予先投簪稠疊
乎惜別之書委折乎勞問之言峽風驚吹訃音忽傳始
駭未信已而果然嗚呼南疇主人止於斯邪摩圍誨言

卷韶在耳渝城賜章蕭蘭溢紙隕涕三秋送君萬里巫
山高兮崔嵬瞿唐靜兮清泚魚石慘兮欲移象瀕愁兮
倚峙善人兮云亡時世兮殄瘁嗟婺宿之精靈一去兮
不復還惆悵乎隨楚黔巫之人結長思於千祀某病足
莫前遣子奠跪一慟心摧忍望靈几

祭張朝舉文

學古人今言行純實蘭蓀其芳松筠其質文敷春華心
明秋日用柔非流體剛不激玩書燈青延賓盃白我官

黔中和光得挹儼乎在瞻温乎其即談喜汪洋事皆根
極有來七年交好愈堅茗椀芳尊月戶風軒無魚不書
無鴈不牋顯同光塵隱居青山我歸自夔艤舟涪水相
期從容商酌義理去鄉加憂得朋而喜曾曰幾何遽此
契闊峽澍滂沱黔流湍決蛟螭喧虺罔象猖獗怒濤湃
澎孤舟震疊馮夷懦慵江靈畏怯坐視吉人不容數脫
天可問乎嗚呼汨羅自投而三閭以靈水中捉月而詩
人以神抱道而沒者未必真溺枉道而生者猶為陸沉

過涉之凶不可咎澤減木尤足以表獨立不懼之人君
可無憾於此矣

祭友人伏德華主簿光祖文

嗚呼德華天何予之厚而奪之速耶志度恢擴不拘小
器有用世之量天之厚吾德華者深矣讀書窮理務在
造詣有用世之學天之厚吾德華者至矣運量注措切
中事機有用世之才天之厚吾德華者得矣容貌魁梧
離倫絕類有用世之軀天之厚吾德華者著矣漕省連

魁時方壯歲有用世之地天之厚吾德華者至矣開太
平正人心扶善治人方以遠者大者期之千里驅車半
塗折軸何天奪吾德華之速耶賑窮恤貧人所難行者
君能為之養孤鞠遺人所難行者君能為之扶弱擊強
人所難行者君能為之排佛斥老人所難行者君能為
之施設雖不獲大展布聞其緒餘亦足以使人興起也
從容乎武信之遊款曲乎西州之行留連委曲乎合江
仁懷之避地歲月推遷情意一日未有如予之知德華

最深而德華敬予最至也師友味濃死生分隔可勝痛
哉梗塞修辭長號致耐靈其有知髣髴來享

祭心友羅東父文

嗚呼道之難明久矣蜀坤文之地也孔子之徒三千蜀
無與焉孟子高門弟子蓋不少蜀無聞焉我宋濂溪先
生繼孔孟絕學於千載之後仕於吾州宜速肖者衆而
當時所予進僅見於張子宗範養心亭一說至於太極
通書至德要道乃傳於河南二程先生又傳於橫渠上

蔡和靖思叔龜山諸先生而蜀又無聞焉百有餘歲至
文公朱先生集二程子及諸先生之大成以陶冶斯世
升其堂入其室者徧滿天下而吾蜀奮超卓之大志不
遠萬里往而親炙者惟吾鄉性善先生與涪陵蓮蕩先
生二人則斯道之傳不亦甚難矣乎惟性善得吾文公
之心蓮蕩得文公之易其統不為不正其道不為不大
其學不為不精粹而世之好尚者鮮則道之難明不亦
又甚矣乎吾友東父資稟粹而識見明雖從事科舉業

時又存心孔孟玩志伊洛自弱冠與某兄弟相往來務格物致知求聖賢之心逾半百不少變家事蕭疎場屋屢跌宕如也亦足以見吾友體認深而造詣至矣雖未得為文公徒而私淑諸人也某去年辭官將欲相與徜徉林泉資琢磨磋切以力行求至而遽聞傾逝可勝痛哉可勝惜哉夫君子彫謝則旺氣衰明哲云亡則正道晦吾友闕吾道盛衰者也而止於此道其果難明矣夫遙寄一奠不勝號慟靈其來歆

天府疏

伏以清虛一大之中默存主宰冲漠洪濛之始神運機
緘宜有真靈妙斡元化自我民而視聽奉帝意以周旋
求福不回如響斯答恭惟萬善之長五常為仁道惟切
於好生職務司於錫福申休釐祉覃顯悉幽敢瀝凡衷
仰塵聖聽伏冀高明下耳工宰垂慈俯憐哀痛之誠大
沛洪龐之澤神盟鬼詛盡雲薄以天空債主寃家即水
消而冰釋纖塵不滓厚夜長春

功德疏

流虹繞電五百年元聖之篤生就日望雲千萬歲洪休
之虔祝矧堯天之在上正佛日之居中式披海藏之文
用介河沙之福伏願金輪益固玉燭彌調等南極之老
人有光其應同西方之壽相無量斯年嘉與含生同躋

仁域

僧寺

長發儲休光啟虹流之慶天保報上歡騰鼇抃之情矧
同三千臣之心祈永億萬年之命仰企紫霄之御恭披

玉笈之文伏願弼我不基受天明命文舞干羽邊無飲
馬之虞仁銷戈矛農有夢魚之慶斂時五福錫厥庶民

道觀

代趙守為民祈雨羅漢道場疏

大寧監

大旱望霖曾不終朝而不終日至心白佛先皈依法而
皈依僧慈雲即滿於太空法雨溥霑於天下有言至再
惟願登三

祈雨疏

伏以齋心籲帝冀生百穀以成歲功憫雨責躬期不終
朝而滿天下香煙繚處甘澤隨來一念間酌水獻花彈
指頃決渠荷鍤溫飽遍他諸法界仁慈端自大神通

三宣

僭恒暘若其責在吏不責在民歸斯受之不入於老則
入於佛彈指三千諸世界至心五百大阿羅鉢盂承來
洒成甘雨拄杖插處涌出源泉溪流岸岸深已失三春
之種稔農務村村急無妨九夏之耕鋤知感佛菩提無

窮食供養

三宣引咎

憂民閔旱霏微雖沐於屯膏白佛熏香霽霈願霑於解
雨思致咎實由於拙守痛無辜何與於生靈苛政重斂
稔愁嘆之聲滯獄繁刑積冤傷之氣離散未安於鴻鴈
縱橫猶肆於豺狼教化悖施膏澤不下居焉謬政罰以
愆陽深責己以凌兢悉與民而洗滌滌寸心之懺悔冀
五眼之開通三日以往為霖油然作而沛然下八政之

先曰食生者衆而用者舒

紹慶府勸農文

勸課農桑太守當務也然黔中之俗不憂細民之惰農而患豪民之妨農黔地幽深僻遠民生其間無兵革盜竊之虞莫不知以剪荆棘啓山林側耕危穫為務獨其間豪強狡險之家志務貪恠計專刻剝不求富於詩書而並緣敷糴以傾農之粟菽不用巧於文章而工設機穽以罄農之貲財繭絲竭而并布縷牛畜蕩則質妻孥

敲朴任情役使無節外馬出入臺府以張聲勢交結公
胥以固威權百端誇耀以堅其畏信千計圍繞以絕其
辨明是至執鋤耒耨恨銜冤不怠則逃田野曠而種
藝疎職此之由今太守丁寧告戒當職決不為非法之
科爾豪民斷毋肆暴橫之斂太守惟知有公陸梁者勿
恃爾力太守惟知有法狡險者勿矜爾智主佃相資患
難相恤疾病相扶困乏相賙孝悌忠信相勉則人民日
聚田野日闢粟菽日多貨財日富風俗日美此爾民之

福而太守之願也苟違斯言罰及爾身不可悔

十一年二月勸農文

農而加以勸為惰農者設也農而至於惰由妨農者致也太守始至灼見此弊抑豪強戢貪暴去狡獪除橫斂省徭役務使爾農無惰而不待於勸也整整三年既有明效爾民之所知也今太守將去矣天下事要在始終之如一爾民其循循勉強者毋復橫以失良心貪者毋復肆以喪善心狡獪者毋復縱而變爾遷善改過之

心勸農桑者毋懈惰廢弛而棄爾服田力穡之心而太守決不以將去而怠於擊強怠於戢貪怠於禁暴決不以將去而妄有一毫科取需求以煩爾民而隳前功也太守之言信如金石爾民敬而聽之毋忽

大寧監勸農文

出入阡陌勸民勸耕二千石之先務也今時既急於平時而大寧尤切於他郡請為爾民詳言不可不勉者四他郡屢經殘破容冀免賦蠲租大寧築底世號桃源租

賦不可寬假汝民不可不勉者一也常歲有下流之粟
可補乏闕今回易不通無所仰哺爾民不可不勉者二
也石田磽确耕鑿無幾而商旅雲集流移輻輳生者寡
而食者衆爾民不可不勉者三也山深土寒五穀晚熟
而密邇邊陲秋風早驚爾民不可不勉者四也夫爾民
徒知歲仰煎煮以為衣食而不知時異事殊知地居險
僻可保安寧而不知長慮却顧此太守之所甚憂也方
茲春事正殷土脉已動宜同爾父子合鋤耦耕土地之

未闢者闢之母使地利之有遺也田疇之未易者易之
母使地力之不盡也婦力於蠶母樵彼侯薪而弗烘于
燧也女勤於布母不績其麻而市也婆婆也斷斷然家
以務本為心切切焉人以逐末為戒菽麥如水火母資
之他所而自不飢布帛如丘山母仰之他人而自不寒
穡事早登武功載纘鍛乃戈矛礪乃鋒刃穀乃甲冑備
乃弓矢據險守阨以護鄉井而保妻子此太守望爾民
之至心也若夫順豐年逆時雨禁貪暴戢寇攘爾民之

望於太守者予亦知所自勉焉

夔州勸農文

勸耕舊典也太守自令而倅倅而州七年於夔扈農之
辭亦既諄諄矣今春當告民以新去冬烽烟四起鉦鼓
時聞蜀西之民以圖事不早狼狽困窮所賴玉帳密運
竒謀掃清大敵保三蜀而護全夔爾民得以安業者拜
擎天之賜也今春事方殷東作當秩可不以早之一字
為爾民勸乎火種者宜早燒畬水種者宜早稼澤磽田

宜早墾闢原田宜早服耒深耕易耨使五種早生勤耨
亟耘使九穀早熟桑早蠶麻早緝事育之計早圖禦冬
之蓄早備早滌塲早納稼早輸送早蓋藏早保聚毋爭
鬪訟獄博奕荒耽以害汝之早務和順輯睦相扶相助
以成汝之早此太守深望於爾民者也不橫科需不急
追擾不差黃皂下鄉不容公吏生事使爾生計早遂此
太守務安於爾民者也人人早思事事早辦則一冬早
早快活太守視爾民如一家父子故以早為告爾民敬

而聽之毋忽

廣安旱代趙守榜文

竊見本軍旱暵逾常祈禳未應稻苗已稿歲事可憂當使修己省愆自責興利除害外尚慮曰官曰吏若士若民舊染入深未知悔悟是致天怒未解雨澤愆期今具合行悔懼十條揭榜市曹發下縣鎮張掛曉諭庶遠近通知上下改革共回天意

一當使深自悔懼思年穀不登則無以措其治凡從

前苛政之害民者已即掃去善政之利民者已即舉
行訟獄淹滯者已為疏決冤抑無告者已為伸理求
直言以達幽隱平斗斛以便供輸又將思賑窮之策
求弭盜之方徭役不興賦斂從薄官則進賢能而退
凡庸吏則用循良而斥貪刻當使加之廉謹儉約教
誨撫字庶幾可以感召和氣而格天心

一士大夫當深自悔懼思年穀不登則無以振吾職
凡從前政事煩擾務去以便民號令峻迫務弛以寬

民職教化者憫三綱五常之盡數而念念修明斂財
賄者念民膏民脂之已竭而勤勤寬恤居幕府者慨
然興懷而振起條章法制之壞司犴獄者惻然動心
而哀矜桎梏捶楚之傷筦庫之士念一鏹一粒出於
民而毋欺其出入民社之家思一飲一食得之民而
深切其撫摩自州而縣自縣而鎮檢身戢吏懲忿窒
慾庶幾可以感召和氣而來天眷

一吏胥當深自悔懼思年穀不登則無以効吾役凡

從前欺公罔上之心害民益己之習貪恠黷貨之念
宜一切洗濯思巧法傷人終遭凶禍而發仁心思害
衆成家終非長久而生畏心思橫取悖入終必破敗
而守常心毋徇權勢毋害善良毋欺困弱毋黨凶盜
自吏而胥自胥而徒相告相戒相勉相率庶幾可以
感召和氣而免天殃

一為士者當深自悔懼思年穀不登則無以成吾道
凡從前言語動作或不合於聖賢措置云為或有負

於名教宜一切省察入則實孝父母出則實悌長上
兄弟實用其愛敬朋友實用其誠信實欲仁民實欲
愛物毋盤遊毋逸樂毋言堯舜而行市人毋外衣冠
而中木石父以詔子兄以詔弟勤勤勉俯仰無愧
庶幾可以感召和氣而致天休

一為農者當深自悔懼思年穀不登則無以力吾耕
凡從前播種耕鑿或不本於神農長養斂藏或不尊
於司嗇不昏作勞歟不服田畝歟布帛菽粟狼戾而

不知檢歟暑雨祈寒怨嗟而不悔歟不則仰不知事
父母俯不知育妻子疾病不相救守望不相助窮困
不相賙飽食煖衣逸居無教致此大戾宜一切懲創
遷善遠罪庶幾可以感召和氣而回天意

一 百工之事當深自悔懼思年穀不登則無以利吾
器凡從前侈美華麗之奇苟簡固陋之習宜一切蕩
滌治者精鎔冶而革去朽鈍陶者精埏埴而毋事苦
窳攻皮必堅攻木必良切磋必易斲削必善毋售麤

以為精母飾惡以為良母鹵莽而苟目前母滅裂以
欺後日陶冶埴埴金木皮色更相勸勉更相表率庶
幾可以感名和氣而弭天灾

一行商坐賈當深自悔懼思年穀不登則無以為吾
資凡從前飾偽售假以為良圖機計巧算以為能事
者宜一切悔艾母事豐息母窺厚利母欺權衡母詐
度量母變亂真假母移易白黑母乘人之急母要時
之艱母聾瞽昏癡母籠罩拙訥由城郭而郊野由郊

野而道途務相勸告務相禁止庶幾可以感召和氣而消天變

一道釋者流當深自悔懼思年穀不登則無以遂吾學凡從前相願諸佛而心不諸佛冠衣老子而行不老子宜一切動悟毋懶惰睡眠而不勤禮誦毋放縱畜養而不顧因緣毋佛前偃蹇而恬不以為罪毋寺觀賭博而懵不知其非毋薄人供施毋強人莊嚴毋貪貨財毋嗜酒肉自禪而律自觀而龕更加警省更相

啟導庶幾可以感召和氣而追天譴

一軍禁之士當深自悔懼思年穀不登則無以足爾
之食凡從前放肆暴橫之習鈔掠掃蕩之心宜一切
改圖思地無民則我寧獨存民無食則我寧獨活毋
謂天高地厚毋謂鬼遠神幽毋謂世道終不清毋謂
王法終不行毋掠人貨物毋毀人屋室毋伐人林木
毋驅人牛羊使田野安居則爾之糗糧自豐市井完
聚則爾之飲食自足老者語壯智者誨愚斷自於今

循循率率庶幾可以感名和氣而息天怒

一遊手之徒當深自悔懼思年穀不登則無以營汝
之生凡從前不事產業而營營趨末之心不勤農桑
而斷斷射利之習宜一切自覺夙興夜寐以聚百穀
勞筋苦骨以就百事毋尚賭博毋盟偷盜毋嬉遊以
仰食毋安坐而糜財販夫販婦發公平心屠沽樵漁
生慈愛想明者語闇覺者訓蒙朝夕思惟晝夜記憶
庶幾可以感名和氣而免天罰

欽定四庫全書

集部
字溪集卷十一

詳校官庶吉士臣初喬齡

主事臣呂雲棟覆勘

謄錄貢生臣苗序漁

欽定四庫全書

字溪集卷十

宋陽枋撰

詩

五言古

謁九江趙守

浮舟溢浦春
民謠舉欣欣
問民寧底樂
州有賢使君
帝胄擢清班
江國煩慙懃
儀刑金玉相
肝腸錦繡紋
周南藹忠厚
大雅卓不羣
固本屹磐石
理兵無絲棼
城堅萬

里長氣壯三邊軍短吟亟搜枯弄斧當卸斤聊此窺一
斑所見諧所聞願公慨神州邊腹久中分五嶽判地氣
三光離天文倒竭五湖波一洗九陵氛鐘彝勒偉眩汗
史照芳芬此烈丈夫耳循常奚足云

漉鼻峽

雙穴流清泉古來名有自至今存一息呼吸竅萬類山
以泉為津石以穴為鼻無形本諸天有質著乎地

遊下竺飛來峯和存子姪韻

嵯峩擅北高幽靜還西竺虎蹲石根竒龍蟠藤蔓曲面
橫白水湖背列濃嵐谷鳥碎山逾空起予詩不俗

過九江望見廬山立雪一峯和全父弟韻

阻風桑落洲悠然見廬山白雪滿蓮峯皓轟九霄間新
晴破積陰天宇豁開顏玩圖仰斯人懷古涕潛潛準擬
進扁舟躡屐登螺鬟飽諳風月歸庶幾無虛還

和趙景賢使君入昌溪即事

樂灘泉東
平巴巫

東出峽如筒北行溪似線晨發怯春寒午炊喜破曉灘

高石嶽嶽浪急珠璣濺平生憂患心對此倍兢戰棹夫
捷如風舞篙接飛絳昔觀武陵圖今見武陵面巖叢放斧
斤掛壁發葱蒨半天矗亂峯橫煙鎖寒練猿鳥生意深
詩筆寫豪健先生巖壑姿對此聊自厭險極復推竒一
覽嗟未遍老眼仰貪看花生渾欲焰人喚不回頭決皆
強自勉造化藏秘竒人生能幾見夙昔困塵埃比來得
清玩異境延高吟勝覽愜幽念直疑紫霧深秘隱豐城
劍便欲於此中遊世真無悶朝餐色鬢髮暮遊光潑灑

還恐利名牽回首成健羨

峽州程彥彪簽判賦桃花菊讀之良有佳致嗣
韻敬呈覺其東塗西抹也

羣芳發天機妍媸太紛競秋菊繁有徒色以黃為正淵
明具卓識主一無多柄日鋤三徑荒取友霜松勁後人
悅紛華逐物情其性不見黃居中方隅靡從令綠衣尊
間色心憂切吟詠陶菊抱幽姿漢廣絕游泳紅紫雜賦
形變化理難竟妖嬈妬端莊超乘誇捷徑黃花秋露中

心與晚色淨品類富脂鈿盛服粧亦靚佛頭詫奇裝桃
花卑異姓殿荷呼是兄先梅可稱孟就中甘作君今古
有同敬伊其標上藥隱居重題評汲泉擷芬英神功治
未病味真乏佳色苦坐芳筵屏輕身引華年著龜堪鑑
鏡獨立傲秋霜高風誰景行嘉哉夷齊賢不仕西周盛
解約紫茱君梗檜延福慶登高睨八荒期活蒼生命君
家瓮頭春胚暉歸酒聖

程宣義善造
菊花酒也

紹慶府教廳瑞麥

并序

淳祐庚戌麥秋于學圃得兩岐者二三岐者
一前此未之見也先是平地溪細民牛產二
犢嘉瑞迭至厥有攸自具以告州長金華王
公先生曰是乃閩帥復漢中之休徵麥以下
坻京之盈牛以兆田萊之闢天地順助委和
而發祥矣枋興感先生之至言欲鋪張揚厲
而材未之逮敬撰成古體三十韻以紀事實
且獻且賀幸恕其狂斐而垂覽焉

耕稼問黔巒永黍慳培塿秀實僅有之嘉祥貌烏睹府
主金華仙農事躬緬縷暖律笑吹鄒長府肯為魯節用
寓封殖寬征從字撫去年民病獲公把漏天補今年趣
春耕公有月額雨至和委來牟兩岐分藝圃雙秀可竒
觀三穎駭珍吐一如荀氏龍頭角森踔踔一如賈氏虎
偉彪稱最怒友于好弟兄長岐支偃樓芒穎乍崢嶸襁
褁辭姬姆苗脈共根株萬物本乎祖見說西家牛二犢
同一乳瑣碎衆難并異聞香前古歸功二千石為言物

有主憶昔辛丑間紅塵飛白羽陸海沈炊煙原田沒榛
樵殿角深顧憂宅西命山甫太平登九年魚鳧藹生聚
長嘯孤雲端漢中我疆宇片心天地通助順知己許畜
繁田不蕪麥瑞富高庾萬竈飽貔貅餘勇洵可賈坐縛
長橋蛟行却九關虎挈還天子地醉言執童殺袞衣逐
歸禾上瑞此馬取癰儒嘉聞言中夜長起舞欲補嘉禾
篇俚詠驚瓦甍

壽李夔州乃翁

四月十五日

乾月生真賢老子其猶龍主靜以觀動萬籟鳴秋蟲片
心閒淵明結社同遠公俯仰身世浮妍華收晴虹堂迥
妙香凝超然天地通至懷三釜外真味一甌中震長可
代父物生辰與同正東權發育造化誰能窮良居東北
隅生意來重重高枝翔鳳凰嚙鳴梧風嘗聞乾一氣
稟付人稀逢公全六畫陽何始復何終杞菊不足蔬芝
苓非所供剛健自無息天人知共宗世無飛昇客浪說
呂仙翁世無武陵源異境空蟠曾惟公秉乾德七十元

春容舉家秀而賢無非乾所鍾生生之謂易笑言支長
筇舉杯問蒼天天高杳無從我欲攜義篇相隨鶴山峯

崑嶽有佳人四章壽黃循齋

崑嶽有佳人婀娜蒼松姿金石結根柯綠葉瓊瑤枝抱
陽爐峯春毓英巴水滋絲苓濯繁霜清樾搖坤陞亭亭
拔煙蘿渠廈誰當支工師胡弗來歲寒心自知

崑嶽有佳人猗猗凌霜竹叢篠列委翳蕭森散清郁常
虛君子心而聳高人目娟娟鸞鳳棲濃濃露華沐玉兔

投西隅金烏出暘谷
瑟僴不可謾聊爾為君祝

崑嶽有佳人神龜支其床
問龜生何年太素含混茫
問龜何所殮沆瀣凝秋陽
問龜何所知一理周八荒
佳人拊龜笑我心非汝量大
化難淺測縮首宜深藏

崑嶽有佳人挺挺雲中鶴
帝鄉迴驚心人寰寓其託
仰雲引圓吭九皋窮碧落
瀛湘滄海身稻梁寄情薄
昨夢世未醒清喉不容寔
鳴陰子必和天理亦昭灼

開慶元年二兒自白水之江陵間作數語送行

且勸歸也

舉家出三峽去鄉二千里卜築罄囊資苟全留白水誅
茅炊赤稻稊稗日嵌齒芥根充鼎實屢空吸清泚殘編
發空箱矮窓聊復爾晝誦夜無燈早寢接晏起江國多
雪霜木火謝司燬凍泛襲重茅刮肌復侵髓瓶儲斗升
粒食聚三百指子行其謂何艱難急生理輕財性則然
苦節此時矣荆江萃交朋酬答寧容已長語廢百事頻
遊迷短晷接羅防倒著拍手兒童恥食息在顧養交杆

繫金柅有懷趙乙囊勿錯孟嘗履泉竭云自中風驚吹
成壘廩粟不可縻市門亦難倚我老驚太哀孫稚要提
耳來歲屬庚申上旬逢丙子人事顧天時溝壑虞近止
梅臘早還家濁醪同酌兒

與存子姪王南運上風聯句

附

舟行緩東去波颺疑西流

南運

塵揚頻閉目草偃付回眸

正父翩翩沂岸鶯緩緩沿波鷗存子聚沱留積滓逆浪集浮

正父門窺雨斜入窓望山相留

南運棹苦掌痕腫烟回皆

淚浮父正客舟上急急我楫去悠悠南一程分兩日半月

僅三州僕嗔糧易竭客怨利難謀柁斜橫水面人宿避

沙頭父正嘯想武陵虎化催西海虬欲寄風伯語聊以吾

詩投何如還借順咫尺登瀛洲子存

七言古

送謝方伯赴試

春桑催蠶日遲遲春蠶食葉開文闌桃源雖好不可住
高人夢繞故山薇金雞啁哳喚出日輕舟短棹風吹衣

莫問虹梁春燕入莫吟西堂春草萋水光山色二千里
助君筆底龍蛇飛丹成九轉天上去五雲膠轄黃金扉
回首故鄉煙靄暮城郭如故人民非年來世事轉頭改
不見華表丁令威送君南浦祝此語佇立江干背夕暉

回陸主簿賀生日詩

南華眇彌誇靈椿八千為秋八千春要是循名須責實
人生三萬六千日世間修短皆自然造化到底難為言
一十二萬九千歲更加五百乾之允安樂老仙窮象數

三哥笑言譏淺露只如三百六十五天運從來周一度
太羹玄酒常渾渾何人於中羅八珍八珍向裏有真味
未可以天而廢人神數自一而至十萬物生成由此出
坤兌無首乾無終陰陽為用常虛一顏子聞一以知十
清明氣稟不苟畀六德六行惟俱全只向網常窮所止
人能陋巷樂簞瓢踐行即是奇男子看盡古今為聖賢
底事有經還有權紛紜雜擾語不盡斤扁斲惟心傳
道至無言而止矣此外如何別有旨萬靈昭灼會寸心

須使愛之若桐梓。竭來城市辭山林。蕭蕭兩鬢雪山侵。
感甚秋高華晚節。搜枯聊作寒蛩吟。

壽鄧子西知縣

猗猗竹繞鄧家灣。亭亭屋背摩圍山。當軒水花日噴薄。
覆戶雲葉時爛斑。中有高士金閨客。元從洞府生人間。
捧觴天爵役人爵。戲彩前班羅後班。不妨花縣春風晚。
且對萱堂白日閒。剩將千卷課兒習。博取一笑開慈顏。
和氣向晚薄。蔥蒨書聲半夜隨。潺湲只恐天上妬人暇。

催公拔宅離塵寰玉堂將母奉珍鼎
鏘聽羣仙鳴佩環
丹砂九轉戒獨善刀圭分遣扶艱關
功成麟閣歸來早
荀輿隨步羞桃薦菊紉蘭蘭

用昌黎賦鳴雁韻勸蹇從叔出峽與乃兄相依
楚天空濶雁南飛整整秋來春又歸
腸斷孤鴻鳴失依
重雲片影儔侶稀野老吟情託興微
樊籠休羨稻梁肥
岷峨回首寸心違華亭清唳昔人非
湖北湖南秋水多
洲渚星稀無網羅平沙雪落聲相和
俛仰塵世應無他

君於此處意如何

和趙使君喜雨

舉頭日日雲如血，遍走羣祠腰漫折。
惻隱存君一念間，造物於人豈終絕。
天眼豁隨公道開，宵人於此何有哉。
煩歎陡逐苛條去，甘澤端從德意來。
公心與天同一字，那是經生分別處。
佳句催成頭上雲，仁言散作空中雨。
開軒對雨卜香秔，鈴閣無風還自涼。
新詩寫出天人際，賡歌細與問蒼蒼。

黃池舟中和全父弟韻

江上平隄隄上路隻輪來往舟
泝沂林踈風葉墜輕黃
征雁聲中秋暗度來踏東風歸
歲暮佳山好水無重數
揩摩老眼待冬深更看霜林排
雪樹岸木稠邊屋作鄰
港魚多處鷗成聚竿蓑擬欲箇
中畱却恨冬風催我去

和存子姪上風嘆

家在岷峨峯六六文章李杜追
芳躅有詩吟破雪飛花
無酒斟來體生粟觀光上國肩
共摩舟下長江尾相觸

行行得意買湖天
攜手風涼曾點浴

雲山避地

和存子姪韻
瀘州仁懷堡

依山茅屋兩三間
與世相遺盡日間
背擁藍屏半天碧
面對參差橫架山
徑草蒙頭雲覆屋
泉甘土肥似盤谷
劍峯林密杳無邊
綿峽潭深幽莫燭
有鮮可食美可茹
康樂和平長自飫
有時拂石弄泉聲
有時策杖登山去
山中日沈山月出
巖暝林晦總佳適
平石如臺倚山隈
準擬結茅閒讀易
尚論古人得我心
商傅周姜漢子陵

好共栽桃艷長春却恐漁父來相尋

壽程彥彪簽判乃翁

黃鐘宮動夏秋分夜來一雨如傾盆炎雲洗盡金天渾
老人星見程家門老人降生叙南村昔日聞名今共論
耆英侍坐聆嘉言八窓玲瓏笑語溫千載一朝逢漆園
夾搗小澗開窓軒雲鷄月犬聞朝昏衰情晚態常相存
翠竹紫鳳高騰騫梧枝裊娜棲雛鷓琴彈碧玉瑩篴著
爐養白砂賢弟昆胎仙三疊舞翩翻玉液九轉朝崑崙

沈澁為飲霞為飧菊酒酌客香盈樽欲隨枕石漱潺湲
只恐鼎養歸天閣九老圖中姓字尊月倦指點詩輕捫
莫學劉阮窮溪源儘教親見眼前七世森仍孫

回程宣義賀生日詩

錦章卷遺書八分獨繭抽緒浮金盆太羹玄酒淳風渾
秋草得暖生華門隔溪來往如幽村百年時叙從君論
直誼高情無綺言寒陬冷宇回春溫鄭公耆英思陶園
顧我芒屨蓋高軒感君昭昭排昏昏心期好語饒溫存

惠然長風來孤騫九苞後乘彤庭鸞肯令緝榻依陳蕃
相對怡愉諧弟昆跋紅坐久金爐翻天雞不覺鳴崑崙
清蕭滿腹煙霞殮歸來捧朽哦空樽新題壯筆流飛湲
欲持此詩排帝閭祈我友君同壽尊座間談笑舌莫捫
伊洛派脉探其源與世無窮振振繩繩之子孫

送文大監赴召

雲門大卷聲鏗鏘

公所居地名曰雲門

不比寒谷號蛩蟹長笑歸

來書滿床着眼不用垂簷裳黃緣仕版亦逢場一鼎熟

處元清涼年來道心包乾剛鑑淨水止無迎將付物大
公齊混茫玲瓏窓牖開八荒霽月海東懸秋霜照破蒙
昧橫津梁不才賦資如點狂柱倚寶瑟心陶唐永輪玉
井情徜徉祥雲麗日希餘光布帛菽粟味尤長尋繹此
樂徒激昂頎然美人天西方許我立雪來其旁欲坐春
風吸餘芳聽說夜話據中腸又聞催歸侍玉皇挈提北
斗斟天漿淨洗世表塵昏黃席此廣宇歸康莊起舞掉
頭帆飛揚誓鳴急漿隨烏檣參同希傳魏伯陽

送雲山文先生吏部赴召

雲山至寶非和璧光耀燭天難必密一朝天子闡坤珍
此寶肯為蜀人出寶生蜀東六十年蜀勢關吳妙陳述
蜀為頭目吳腹心頭目清明腹心佚蜀為藩籬吳與堂
藩籬堅固與堂寶蜀若顛危憂在吳夔峽豈能過迸溢
自從蜀口棄三關托裏金城更齒萃戎馬衝奔二十年
此城處處皆屹立虔釗俘掠技已窮羣聚寶峯頻出入
抵礙堅城不得戰轉攻雲詔謀虛襲欲踐辰沅闖廣南

後顧有蜀還恧尼雷屯漢中綴祕師計俟萬全無一失
我向嘉渝增重屯大理垂軍須縮經夷陵近聞列守戍
似謂蜀險為難必或言東晉不用蜀是時南北只守一
如今敵人幹腹來不思保蜀更何術莫虞海道要先防
雲濤湧沸蛟龍慄臣寶一戰振天威至今敵膽猶惕怵
莫憂淮堧近建康萬柁舟師人素習踏車橫江臣世忠
北人言之魂凜凜荆南雖云瞰大江曹瞞百萬幾禽執
趙公堰匱孟公湖有如弱水蓬萊岌當今重勢在蜀川

蜀事艱難今轉急井絡丘墟煙火空荆棘漫彌虎窟室
頻年旱曠民流亡褚無完裳瓶無粒兵將願戰民效死
彼此交病財不給就中活着猶可為民心戴宋元一日
益兵降財勞蜀民旒冕周諮宜委悉射干狼毒漫戰吻
芝朮參苓難愈疾懇切深惟保蜀方蜀苟措安國寧謐
和存子姪長吟鄴都韻

江肥石沒浪壯激水瘦石露灘無聲叢深鹿來平都重
林槁鹿去平都輕消息盛衰有如此是理見處須分明

孟叟晚年盡心作孔聖垂老春秋成當知血氣命於志
不同萬物殊枯榮好向先生問心極萬里浮舟入帝城

長風峽避風和全父弟韻

慘舒異氣無異機交朋論心不論迹詩書一酌飲芝蘭
風雨連宵聽蕭瑟旋調詩律破愁城閒弄局碁消短日
酒來思逸吟轉高笑罷江橫顏自懌坐久那知風袂寒
眠酣未問霜衾濕四時翻轉無停機一理渾融何所適
佳山好水看已多江鄉誰作蓴鱸憶天人之際妙復微

莫事空言須踐實

讀易書懷

家家住坐長安道日問長安何草草春到驪山渭水深
拂石臨流苦不早萬戶千門鎮日開無邊風月隨人好
滿城花柳斷鶯腸芳菲易歇天難老

賦趙守接竹引巖泉

冰絲寶瑟無膠柱事省庭空引泉注為愛心隨水色清
從教竹傍山腰去循除泐泐聽潺湲華襟湛徹生靈根

縱使波深池自滿尚嫌鯉躍圓荷翻破除崖岸非落泊
虛室融融自出白通塞默知箇裏心姪妍各付水中色
自來道體如泉流晝夜不舍無春秋希音解入幽人聽
世間俗耳徒瑩篔沈沈夜永寒聲出宮商寡和鳴琮璧
山高月冷天地空寸地希夷無畛域架竹主人還記年
山下出泉常不乾凡物有本自無息對泉玩理高懷寬
先生仁念泉初達蒼生鎮爾銅烏渴太空一滴著人清
生意汪洋湖海闊野人不作名利貪飲水曲肱心自甘

時乞一甌空煮茗快讀義經井九三

少年看花行寄示誼儒姪

少年看花日千遭黃金買笑俠氣豪酸斟西涼綠蒲萄
燕歌趙舞紛綺羅插花上馬玉顏配鞭馬如風花底過
九天閻闔手可摩揚眉不怕金吾訶杜鵑一聲啼山阿
門掩綠苔愁秦娥春樹紅顏能幾何萬里封侯成蹉跎
河南布衣正婆婆却笑因風想玉珂未肯巖前捫翠蘿
商丘不唱採芝歌獨深於易如鄒軻紫陽真人聲相和

蓮蕩歸來揚其波我傍梅花讀遺書不知紛紛坐久落花多

丙寅八月旦晨興尚早坐而假寐夢與客誦詩云藜羹藿啜蔬園芳黃花晚節凌秋霜因增成

十韻寄壬兒

僕指寅年已半強煩歎能幾還淒涼風葉有聲宵鳴廊
試擁衾紬眠藤床曉鉦錚錚樓點長清夢了了哦詩章
藜羹藿啜蔬園芳黃花晚節凌秋霜起挑木火然心香

晴雲收雨煙黃江

謝涪陵劉君舉使君見委北巖堂長詩

雪片冬深玩易編正公和氣理尤渾八分寫就龍蛇走
巖藤澗樹常蜿蜒蓮蕩飄裾紫陽學歸來拂拭莓苔痕
巖前世事幾興廢道無今古終長存新來五馬栽桃李
生平伊洛期窮源下車一笑撫江閣片心飛度蒼崖根
生香動蕩滿幽谷秋叢濯雨抽蘭蓀露華滴晴舞夜鶴
雲葉卷霽吟朝猿衰翁白首野人服不愛市井憐山村

太守招來說好語翠蘿有路猶堪捫聽終不敢謝疲茶
瘦筇強拄巖檐門遺書欲傍梅花讀祇恐使人昭昭已
昏昏

和夔州李約齋燈宵

蠶叢今歲看燈宵可人只有峽中州白帝綸巾隱敵國
勝勢蜀尾連吳頭竹枝歌舞喧城市春聲泛鷗鵠浮蟻
府主山村耕稼心挈客銜盃聊爾啞蠻唱雜踐鼙
老者前導幼者從不貪嬉惰樂遊冶只記時序還桑農

村村蓑笠兒童隊桑上鷄聲花底吠春歸野燒雪初融
日上高峯寒早退生意著人人莫知但見綠草生清淒
雪戍坐斂荆江北月華靜照蛾眉西此意洪濛不可道
張皇恐被春風惱酒澆象灑石無言春不生榮冬不槁
穿花鶯曲弄繁絃來尋故壘畫堂前呢喃似與遊人語
今宵行樂寧徒然得賢千里只須一大公方寸無他術
厚地不填無底谷萬流豈漲滄溟溢我談此語費形容
有似樵聲箇箇同野蠶作繭自纏縛拈弄輕絲大巧中

君不見隣女效顰人愛少萬目睽睽分醜好

寶祐三年上巳風雨連日成短歌寄誼儒姪

風雨飄搖三月三綺羅罷遊客停驂滿城春樹烟鬢鬢
朱戶綠窓愁不堪香芹刺泥燕爭銜杜鵑欲啼情正含
舞雩兒童笑鷓鴣堯舜氣象此中涵鼓瑟高人手可探
淡音非雅亦非南太守風期神與參我解此意誰為談
但覺滿懷春酣酣花柳蒙迷不可貪芳菲易歇隨浮嵐
閒閉閣門何所耽惟見千山萬山秀色郁如藍

壽制置夏節使

咸淳丁卯九月十三日

丙申垂尤臨蜀口三十年餘遭踐蹂當時五十四郡全
兵與民財堪著手鋒旗戊午肆長驅江北江南分戰守
彫瘵僅存六七州鴻鴈飛鳴孤夜吼先生受任勢凌兢
倉扁視證亦驚走無麪餽飢難支撐將勇兵強民力阜
前賢用蜀當優游先生端力排紛糾農炊豈暇勸加餐
春風未始一盃酒公心只有天地知雖處艱關安且久
事不辭難功不矜節度樞垣亦廉取天下都統捧霞觴

先生一人更誰有

壽李使君宣義父子同日

黃梅雨陣歇窓紗
庚夢醒來槐月斜
拜後拜前懽陸續
老君謫仙同一家
蟬冠醉倒金貂客
異香飄隨青犢車
旋呼五馬博一笑
酒酣逸氣凌蒼霞
培植桂弄梧碧
生香不斷樹交花
清淨何須餐沆瀣
抱素肯養瓊田鴉
伯陽參同竊造化
高風海客空乘槎
武陵溪深自流水
天台雲渺維胡麻
神遊八極亦汗漫
大鵬希有爭雄誇

藤床經卷得真諦五鼎三釜輕豪奢靜桃宿火熏百和
間引山泉烹粟芽自行自坐脚力輕瘦筇擲棄龍槎枒
從來參苓不到口雙瞳鏡碧顏春華我向關頭伴尹喜
共乞刀圭期修遐阿誰疑年問甲子純乾一氣健而無
息孰測其津涯

五言律

和王季行制幹昌溪即事

異境破清愁狂吟日點頭前峯方極目遠嶺又迎眸石

亂屢支舫灘高常負舟心亨行有尚習坎自安流
鹽米溪中艇桑麻雲外村巖重稀鳥道石勁少篙痕赤
甲此微峽溫泉茲小軒絕憐鷄唱罷近午日方暝

過下沱

迤衍魚鹽地清明花柳天江平拖霧縠山遠帶霜鉛景
好輒作畫心閒連得篇汎舟隨暮靄明月冷浮川

瞿唐峽

壁絕晝昏明猿高髻鬚音不關天宇窄自是峽流深既

曉遲朝日未西還夕陰扁舟平涉險憑取有孚心

和全父弟立秋喜雨

造化仁民意瀟瀟夜雨聲焦原欣得潤枯黍喜更生染
出林陰密濯餘天氣清秋河從此挽盡洗北來兵

茅屋

情契居連屋炊齋雷合煙放懷行共出得語坐相傳竹
戶雲深入蘆窻月半穿桃源今得趣堪賦擬前賢

和黃循齋送景正輔戶曹之夔三首

要路倦登臨
淵明徑好尋
卷收名利幟
揭示聖賢心
月使千家滿
霜從兩鬢侵
逃空三峽客
屬耳聽蛩音

自脫樊籠役
潛心克己私
是求從此日
非莫問前時郡

改山元在

夢移白帝

江流石不移
人心日瀾倒
先覺仰扶持

淺見論成敗
先幾燭是非
端倪還眇眇
勲績自巍巍
學僻門常掩
詩枯毫懶揮
何時住巖下
質問此心微

輓黃循齋

木爐峯先生之子
養於巴川黃氏

桂賸爐峯月
香飄字水春
姓名天下客
抱負洛中人
膺

仕方三紀徂年未六旬循齋餘售用何必歎窮民
憶昔論文友如今舐鼎仙周經談正印易學話真傳一
樂堂中語三生石上緣蓮峯望崑嶽惆悵白雲連

挽故人

公生百載下學契五峯心崇鼎屹重器洪鐘希太音詞
源擅翻海句律善春金材古誰人識清歌和慘吟
卓世輕財易懸知種德難有貧皆粟帛無骼不衾棺紅
樹悲春早孤松忍歲寒輕颺生宰木多少鼻成酸

挽鄭廣安

壯節從丁卯奇功歲轉新有征皆鼓勇無戰不塵塵棠
國香凝月榆關夢孰春吁嗟河北地今日尚終臣

挽武龍蹇巡檢

仁者壽宜得王臣忠可嘉功名雖有約雲月自為家義
粟飢中糶慈梁雨後斜百年回首處溪冷欲梅花
叩戶憶曾識升堂期再尋仙遊誠絕往俗慮苦盈襟齒
苔晚猶好茶蘼霜不侵思君望阡隴遠樹白雲深

挽伏德華主簿

自幼來受經甲午
同薦庚子同第

黌堂深惜昔六典共尋源
合遂齊飛鶚嘉逾競化鷗紅
顏君早去白髮我空存
方寸千年事悽然誰與論

豁達千人傑巍峩七尺軀
天邊期闊武意外失華途
墮淚一人足傷心二女孤
西溪橋畔塚多少為嗟呼

和前人韻賦昌溪洞口

附

洞口天容黯靈宮暫潔齋
中宵輕靄霽向晚捲雲霾
巖削蒼瓊壁峯攢碧玉釵
水花紛迸峽石乳溷垂崖
噴浪

遲歸舫穿濤急去，薄布飛千丈。直屏立半空，排木任巖
藤束花從澗草埋。高猿枝裊裊，幽鳥韻啾啾。亭午烟光
冷，深春風色飄。便疑塵世隔，直與洞仙偕。意得詩偏好，
情閒樂可涯。寄言軒冕客，名利莫裝懷。

欽定四庫全書

字溪集卷十一

宋 陽枋 撰

詩

七言律

梭花

滿株擐甲詫梭欄葉展蒲葵冬不枯鬼髮擘開纖玉掌
蚌胎剖破細瓊珠熟煨爐火香子笋白飭盤銀美似酥
珍膳莫充禪客供恐猜魚子放江湖

別字文

滿耳聲稱驀沈沙萍根雲葉際天涯襟袖噴撲芝蘭氣
韻味清修詩禮家賸把香編消歲月點無浮葉靚春華
西歸人問簪朋得將作東南第一誇

壽韓司理

不因春酒駐紅顏都是心清事弗關草為圖空隨意綠
花緣客少笑人閒幽情倚棹暫隨水爽氣拄頤常看山
共指武陵槃澗地桃花深處屋三間

壽紹慶金守

神光高射斗牛墟
知是龍泉瑞氣舒
彩映北堂霜後檜
輝連東館月中書
江流麗水描來似
峽束棠溪畫得如
為報鯨鯢休陸走
劔芒元是發硎初

庚子叨第贄合州甘守

吳門扞蔽重夔渝
兩地藩籬屬釣魚
自昔無城當蜀屏
從今有柱壯坤輿
軍心鐵石高深裏
敵膽灰塵築鑿餘
看偃天戈閒夜月
朗聲讀破磨崖書

欲陳禮樂字三千起趨東風萬里船戎馬不禁文未喪

石魚間出瑞開先

時築釣魚岩中獲石魚之瑞

人知制挺摧堅甲政

比黃鐘緩急絃願借風雲乘快便一聲雷爆九重天

賀李萬州守夔

卓名

騎鯨汗漫謫仙臞一世龍門只漢儒天下文章從古有
人間勲業即今無鶴山往事心存蜀象瀕新功力蔽吳
畱取道宗遼外策共為炎宋鞏皇圖

淵淵聖道浩津涯萬里尋師暮景斜濫吹叢中情懶散

彈冠鏡裏髮肥髻蒼龜已卜林間屋青犢還逢關上車
未得乞符求換骨借閒讀易傍梅花

壽蹇從叔制幹

黃鐘大呂播年華簪盞城南捧九霞共說賢察心似鏡
何妨幕府事如麻紛紛吏坐空迷目蹇蹇王臣豈計家
共約歲寒松竹友好攜周易傍梅花

壽蹇用叔姻翁總幹

明知少府是神仙金水何須掛彩鞭喜喜歡歡遊兩幕

平平穩穩過三年紅蓮照水香仍舊緋棗團秋味正圓
蘭玉已堪華晚節更尋小圃菊花天

壽狄知錄

六月六日

熟讀周官知幾冬染人袍就彩絲縫生當永日三三夏
數應西岷六六峯囚放盡言公活汝民期無復鼠穿墉
籠中上藥芝苓富却笑頻看鏡裏容

賀田都統再帥夔

十乘由夔入釣魚飲江無馬鴈安居瞿唐催要金城壁

即墨爭迎鐵裹車八陣旌旗蛇勢整九關風月虎符虛
白鹽萬丈齊天石揭日奇功大字書

桃李三生黃口兒春回桑梓放墳吹燕依舊主今還再
兔守空株懶未移暫對少陵堂下滾遠懷靖節菊邊籬
好風借與一帆飽歸趁江空水落時

謁夔門桂帥

閩歌整暇化清夷笑把宗師正印提繡腑文章開騰馥
錦江桃李爛成蹊旌搖蜀水春浮峽柝靜蠻天月滿溪

衣袞歸歎近宸極殊勲嘉歎殿頭西

志欲商伊學欲顏尋師夢遶五湖間不違誓至仁三月
親炙寧辭雪萬山流海浪浮蝸戰角排雲應許豹窺斑
還丹知換塵凡骨超得先生未出關

贊鄂帥張仁簡

八牖玲瓏義理天復齋心印妙親傳化爐點處金非鐵
更空清餘否亦賢吐息兼蘆湖外月炊生榆柳竈中煙
水浮鄂渚連斗渚公子行行天上僊

不為名韁浪出山朱門桃李恐闌珊師尋湖海曾懷闊
道滿乾坤耳目寬水驛已終三楚尾天閣猶向五雲端
登樓便欲騎黃鶴乞與書生換骨丹

赴大寧司理贄俞帥

見說三關息虎貔風高白帝卷旌旗擎天砥柱瞿唐險
保蜀規模陣石竒誓出祁山禽仲達肯屯漢口學姜維
枕戈心事聞鷄起未必閒眠聽竹枝

入手青衫愧壯顏悠悠底事白雲間有心文字幾千卷

適意茅茨三兩間，可奈紅塵飛白羽。
不容黃叟卧青山，欲從寧水成仙骨。
趁得先生未出關。

壽紹慶王守謹禮

燕寢凝香事自無，祝釐何用飲醪酥。
袴歌雪外暖傳曲，社酒人間春滿壺。
客到競誇逢子晉，我來甚喜見夷吾。
摩圍山下聞摩詰，他日添歸九老圖。

壽劉節判

昨夜天香兩袖中，轉頭人日又桑蓬。
雲龍風虎千年遇。

聖主賢臣此際同翠竹西來方嫩綠天桃栽後未繁紅
人間正喜洪鈞轉莫問天台有路通

壽涪州李漢輔使君

見得州如斗大輕閒將五馬繫榕陰兩江波上千家月
萬卷堂中一片心尚笑龔黃為計淺更尋伊洛問鈞深
莫慳仙李盤根實可與輕紅種作林

乙丑除夕衍少陵韻成七言寄示任兒於珍南

邊隅守歲莫思家有酒盈樽即頌花愛爾和鳴同野鶴

起予返哺學林鴉生香不斷
爐煙裊絳蠟長明跋暈斜
時序推遷休問當何思何慮
樂無涯

丙辰病起示兒

採薪背夏見書雲世我相遺
思轉清識箇凝陰消又長
喜些真火熄還生百年好夢
黃梁短一片閒心白鶴輕
獨擁寒衾長不寐聽吹梅角
動江城

舟過三遊洞知遂脫兵火矣喜賦

端平
丙申

萬里扁舟歸自東
干戈滿地路難通
弟兄一榻聊相對

叔姪雙頭未許同

合姪輩自公峽入
安各雇小舟

三遊千丈險水連

西蜀百憂空家山桃李期堪數共約花間酌晚風

泊舟洞庭雲薄天空湖光可愛恨未登岳陽樓

耳

昨日蘭橈逐順流今朝湖口泊歸舟千山日暖雪花散
萬里風高雲葉收江影曲通西蜀遠湖光橫與北溟浮
岳陽竒眺嗟猶欠付與他年穩上樓

壽鄧子西提幹與乃堂相距八日

碧梧清夢繞紅萱袖橘歸來人倚門七日喜稱王母壽
經旬還捧謫仙尊松知得算霜中樹梅報和羹雪外村
拄杖金魚消息好慇懃拜舞勸加飧

遣季子壽黃循齋二首

五峯高處五雲新黃石先生非避秦圯上未容書出袖
巖前元自易無塵煙霞窟冷苦畱客雲霧窻虛亦可人
好為蒼生徹蒸暑天邊散與一襟春

自得遺書學子房擬來辟穀並山陽仙鄉不秘眼前道

俗相慚無肘後方經葉再傳新雨露桃花重發舊門牆
呼兒莫怕蓬萊遠勤藝南豐不盡香

謁同年許使君德開

人人屬目快星凰倚棹溪頭起漫郎強仕慣聞紆郡紱
綴班希有擅文場賸栽棠蔭兩江綠重著藍袍再世光
人物西清自華選未應琴鶴久松崗

欲造詩壇奪錦標幾回躡足愧還休君提妙律都先手
我漫家吟浪出頭濟世自憐無絕力叩閣剛道有嘉猷

先生若動出關興便爾挑包逐去舟

謁九江周元公祠嗣性善度先生韻

聖賢隨遇即成都仰止宗師謁故居面揖光風江渚遠
心涵霽月海天舒圖由自得前無畫道未嘗亡今有書
共立斜陽歸去晚當年與點意何如

挽樂應乃堂

時應祥唱
第歸哭母

高堂憶昨燕春風雙老怡愉桂棹東藍袖歸時饒榜綠
橘香懷處少萱紅悲纏忍見舟藏壑德感還知月在空

有子天教優好善五花不日賁泉宮

挽南平趙化卿

昔遊曾到萬山峯趙氏樓臺紫翠中六藝近誇三世學
四賢爭顯一家風不堪顧影憐孤鴈恰喜摩天有阿鴻
好是生香元不斷靈椿雖老桂成叢

挽何深甫

羨君底事過時人一點閒愁不到心笑語屢陪桃李酒
詩書曾對竹松林已驚別鶴江天遠何事騎鯨歲月侵

五桂聯芳知有日去尋蕭侶碧雲深

挽趙飛卿

萬翠亭邊山鬱蔥書聲散出五雲重紅萱色改官情薄
綠酒盃深客話濃鴈起秋空從整整鷗閒野水自溶溶
誰人為作坡仙傳弟似穎濱文似邕

蓋其乃弟文
卿所撰之銘

壽張方叔表弟

聞說書臺百世張燕山來數竇家郎含容寸念侔焚券
正直生平等發藏丹桂香浮森駟馬碧梧翠織引雙凰

松蘿歲晚陪真喜染得卿雲爛有光

和楊提刑喜雨

螻蟻何能格上穹況於三伏蘊隆中
辦香載走神龍廟法象俱來大梵宮
出岫金身能普濟臨池玉醮可幽通
尚憑使者踈冤獄歌舞豐年與衆同

詔許歸耕荷聖王又扶衰病過南方
幸親博洽前無輩每歎平反後必昌
請雨賴公誠獨至回天愧我德多涼
作詩志喜親銜袖玩把渾如七寶裝

和蘇提舉喜雨

瞻仰雖勤隔壤穹此誠何自達天中幸憑今日皇華使
不假當年帝釋宮人道蘇天真廣大歲逢商旱得流通
欲知八郡生靈喜七月興歌我稼同

皇上焦勞冠百王精求膚使惠南方驅馳靡憚周原隰
斂散尤高漢壽昌屬邑近方憂水滂單車不復待秋涼
公餘更有驚人句為解塵懷空惚裝

和知宗喜雨

灾祥何必問圓穹自是承流得失中旱魃憑誰投遠裔
靈科聊復啓仙宮天憐南國人民困雨走西郊畎澮通
多謝宗英相慰勞也應休戚畧相同

赫赫炎官未退藏祈禳已盡別無方忽施潤澤環千里
再使榮華及百昌未問民天無欠闕且欣心地得清涼
一杯預作秋成慶草草盤飧不用裝

再和知宗喜雨

旱魃為災百念關瓢中一滴奈天慳講求碧玉仙科秘

叱起蒼龍洞府間神賜甘霖三日往人欣和氣一朝還
憑公大手為民賀五色牋中蜀錦斑

三和知宗喜雨

蘊隆尤更覺天穹誰道滂沱正伏中

是日中伏

風捲海潮雷

助勢夜占星畢月移宮黃雲繆繆村村喜碧玉淙琤處
處通前日勤民均此念尊前一笑大家同

江海人推百谷王可無膏澤惠炎方五龍行水蘇將槁
萬頃秧田喜寢昌不用飲冰祛內熱急須沽酒做新涼

却愁好雨催詩句愧乏良材取次裝

和陳提舉喜雨

愁歎何繇達灝穹秋成恐墮渺茫中五龍偃蹇藏深廟
六佛慈悲會一宮帝勅名山諸洞閉醮開太乙獨函通
應憐赤子車中鮒為激西江遍處同

周家重穀業陳王天亦哀民救此方一雨如傾過衆望
三登可卜見時昌固知福地長無歉尤喜炎天預借涼
耆老首為鄉曲賀唾成珠玉巧於裝

再和陳提舉喜雨

了無和氣格清穹天意難回執熱中驟雨起從南海廟
雄風到自楚王宮却愁水府丹瓢注解使銀河赤岸通
急趁好晴催刈穀坻京相慶萬家同

十萬農租要納王望霓雖切雨何方桑林敬體皇心禱
雲漢終歌國祚昌坐使里閭消歎息幻成境界得清涼
欲知千里人情共盈袖新詩已可裝

贊表茶使

天隅把袖立春風，井絡民情許上通。
煖到夜郎安靜裏，寒消白帝撫摩中。
摘山豈必溪芽盡，市駿何須冀種空。
月渚扁舟書好讀，琅琅聲與大江東。

買舟過太湖口入小港

連天白水渺無涯，短涉湖灣五里賒。
箇樣船腰穿浪急，片來帆腹飽風斜。
日隨飛鷺幾程水，心逐浮鷗何處家。
日落荒溪無繫纜，荻叢深處傍漁槎。

近湖數十里多荒
荻野水無步岸居

民多夜傍
漁船宿

詠黃池詩

姑蘇平野入黃池，煙樹重重綠漲迷。
肆列門前喧竺俗，稻臨屋背儘幽棲。
路長車馬南還北，水遠帆檣東復西。
小寺江心閒繫纜，周迴看盡柳盈堤。

中秋黃池舟中獨酌五首

時全父弟往臨
安接性善船

秋深客棹倚吳頭，喜見江鄉素月浮。
水墨畫成洲渚遠，神仙宅盡水雲幽。
心閒最與趣相會，句拙常憐景莫收。
多少樓臺羅綺席，未知真是賞中秋。

畫橋楊柳繫船兒
蟾魄飛來光滿溪
有水連雲疑地潤
無山礙月覺天低
魚堪寄信應時見
鴈欲橫霜猶未齊
白酒堪沽難中割
呼樽獨酌畫橋西

賞月東西兩地遙
一輪千里共今宵
心中至樂成真得
分外閒愁不復搖
江寺饒吾觀白水

予舟在
水心寺

郡亭喜弟

看洪潮

想弟與舍姪同
看八月大潮也

世間歡賞由人爾
天地何曾有

寂寥

居家賞月天常雨
遠客逢秋月倍明
世事美時難兩得

化工好處少雙成詩如遇興須重賦酒若逢辰且再傾
不是衰遲廢拘檢良心隨寓自忘情

一年十二月華圓何事今宵到處看春夏暖時無底白
雪霜凝處不勝寒酒腸緩放金樽倒詩興何妨玉漏殘
莫學時人貪酩酊清光未澈已闌單

久留黃池待弟姪不至九日獨酌

將道花黃醉彭澤

湖明居彭澤縣
在小孤山上流

又還茱紫酌平湖詩

因得意時時賦酒為無賓淺淺沽藍色已殘千岸柳

無
霜花催滿萬汀蘆間行間坐雲和水不識天工怪我

喜雨賀黃叔厚判縣

去年精禱雨隨至今日熏香雨便來人事只從無偽見
天心端可至誠回溜匙即此知翻雪枵腹何由更隱雷
若使邊臣充此意凶殘到處豈難推

贊何總領

中興賦用倚江淮兼裕良籌仰雋才民社有歌耕足雨

伍符無腹隱枵雷塞邊粟積漢而上地上錢流唐以來
相業理財餘事耳安能鬱鬱此居哉

別黔中趙尉

好風吹雪點征衣認得東君巧轉機北渚燕鴻從背立
前灘鷓鴣喜雙飛梅中有味不妨隱蓮本無心何待依
到處江山生意滿呼尊判倒是和非

寄桃源尉趙謙之

桃源洞口送春歸欲換漁蓑傍釣磯火着高林鴉又散

弦鳴中澤鴈還飛蕭蕭空雨晨光潤耿耿籠燈夜色微
休對癡人說夢野花啼鳥恁天機

江干覽鏡

千重灘淺身曾過萬頃湖深也去來平地雪中蕭店宿
掀天浪裏片帆開干戈鼎沸舟還失炎暑甑蒸師正灾
小艇隨人偷入峽笑開菱匣亦頑哉

壽鄧提幹母

爭似瑤仙捧玉觴一堂四世聚簪裳間中尊俎江山久

靜裏襟懷日月長
薰蕕爛連庭桂
紫橘香濃引誥花香
陵溪種得桃無限
乞與漁郎半核嘗

又

嘗桃不祇似東方
三度濃熏竹院香
眼底兒孫青瑣客
鏡中顏色碧琳房
山屏繡出方壺穩
峽線拖餘翠水長
醉問羣仙休拍手
誰人翻得九霞觴

贄趙廣安

汝廩字
景賢

先生早矣袖薰弦
趁取南風入
晶然燕穩不妨辭
閨幕

魚枯應喜活民編萬家吟賞知微月千里依棲刺史天
河漢定應思黼黻大宗寧許久藩宣

中秋微月和彭水趙文卿韻

剩雨頑雲乍解圍清光此夜擬依稀天工不許厭厭飲
月姊終慳皎皎輝離合隨緣都是樂陰晴任理兩忘機
謝君好語無貂續題拙慙隨趙壁歸

曹都統詩

胷中陳法久堂堂卯歲邊戎真漫狂佇看勝齊歸一鼓

未饒破魏說三當弓刀早落風雲會袞繡行依日月光
已撰磨崖碑萬字為君題破破碧苔蒼

挽心友李應之判縣

書劍追隨徧蜀西歸來窓月聽朝雞相期歲晚林中約
忍見佳城石上題錦里人稀烟冉冉橫川路迥草萋萋
黔南愧我催瓜戍淚落巴山望欲迷

又

妙歲麟經得興微名成四十壯心違半生于德歸門馮

一節夷清在首薇古禮事親輪月曉新詩易箒片雲飛
九京他日如堪作見說非公誰與歸

和郭廣文喜雨

隨軒好雨決渠深生意挽回天地心不是一麾賢出守
何緣三日往為霖勤農襍襖田頭影幽鳥間關花底吟
紫陌桑麻連菽粟從教鼓腹曳裾衿

見歐制幹

殿西歌徹采薇聲記室煩君為一行竇幕有班燕刻重

裴寮得愈蔡功成文書畫靜旌旗捲籌畫宵間鼓角清
今日元戎前長史步趨脚跡好門生

又

尋師萬里走東南性學精微聞兩三風月歸來深體認
簞瓢自樂細沈涵巖前靜索龜圖秘蜀口驚呼蟻戰酣
欲覓底寮整殘斷峽天分借一屏嵐

挽坡山陳宣義

升堂曾得話從容骨相清癯七十翁唧唧愛人皆語妙

遲遲留客屢盃空
眼分青白斯文外
手作推敲雅詠中
我忝金蘭三世契
頗堪溪澣憶清風

池口下小港遇大風

萬雷颺擊一江聲
本是風從水上行
斷港不妨尋住計
修塗未信阻歸程
閒中已會性天靜
忙裏依然心地平
險阻怪崖行半百
扁舟肯學夜多驚

又

詩翁下語寫心聲
說破雲濤阻客行
得意快吟三兩句

放懷休數八千程時因極凍方向暖水若無風還自平
一點陽和消息好江邊柳眼又眠驚

又

水本無聲風作聲何心坎止與流行掀天不礙翻洪浪
到海須知有去程可以東西形暫激不容軒輊性元平
懸知讀易如程子舟壓銀濤膽不驚

挽李致政

鷗閒伴侶子夔邊錫類宗盟計百年準擬歸來尋舊約

不堪相送苾新阡
芝蘭笑語龍山事
桃李樽壘象瀕天
鍾作數行臨老淚
為君滴向碧溪淵

紹慶羅巡檢

蕉溪煙水似羅浮
君著軒亭瞰碧流
東館聽鷄書伴月
南邊休馬鐸沈秋
憐人得飽倉捐粟
送客登山岸倚舟
種玉前村春意早
梅花帶雪滿枝頭

送田使君都統離夔赴合州

季兒夔幕
荷其青顧

英雄才畧暫臨夔
泛綠依紅詫小兒
肯向稠人識毛遂

甘從走督得神師魚城人喜景星出象
頽猿驚仙仗移
七十老翁怕趨走峽江亭上倍臨岐

和桃源宰趙存禮韻

三時不害試鳩工築鑿輪輿職自攻利器祇因盤錯見
淳風須信古今同野桃川谷逢人好春草池塘待雪融
洞口果教花似舊支筇未肯作衰翁

回奉節宰陽季明

只緣心地樂寬平便把青衫付外心
健羨春鶯嬌出谷

自慚宿鳥倦投林光陰有限嗟空度義理無窮要極深
七十老翁聞好語一回吟詠一回斟

臘月二十八日與知宗提舉分歲郡中啜茶于

北樓賞梅于忠獻堂知宗即席有詩次韻并簡

提舶

老病踰年卧晉江耽詩性癖未能降園林牢落梅經眼
歲月崢嶸酒滿缸堂上焚香敬勲德樓頭回首念家鄉

黃柑未拜蕭嵩賜鄉味分珍漫一雙

時得溫柑
各分二顆

癸亥守歲聽兒桃源黃溪村居

貪看子舍築溪濱
屈指除宵又及辰
七八再逢新甲子
十三重記舊庚申
一盃春酒紅衰臉
四世斑衣悅老身

爆竹聲聽桃洞曉
舉家疑是避秦人

正月十三日庚申
是年恰七十八歲

今年爆竹楚江濱
別歲迎春僅隔辰
小築地偏聊爾爾
幽居心遠自申申
兒從豹變當斯世
我得鷗閒着此身
學易假年天若許
橫書長作傍梅人

五言絕句

癸未守歲

歲宜鄉里守杯共弟兄
銜明日人相問行年五十三

逆風返順和東翔姪韻

觀國丹心切橫舟綠水遲
東君如有意風返曉江吹

北高峯

上到北高峯京城一方冊
天邊極雙眸雲濶海門白

湖口和全父弟韻

鄱陽湖口縣山合鎖人煙
石壁排屏翠臨江障百川

秤錘峽

秤錘盤巨石藏重亦藏輕待出持衡手一匡天下平

七言絕句

避地雲山全父弟詩寄梅花

入秋烽火無虛日問谷尋巖陪隱逸水冷山深梅已花
忙中不覺年華易

地僻人稀花自妍世衰學喪道終傳天機妙處人難解
一局閒碁學洞仙

看花巖下興偏長
不減西湖水
月光鎮坐絕無塵
一點壽陽深笑靚宮粧

骨中香徹骨中清
着雨問花不作聲
一氣本同形色異
人花清傑兩忘情

久荒詩律廢陶鈞
妙句佳君語意新
便欲支筇到巖底
不須折贈隴頭春

石筒峽

槎枒怪石亂撐空
岸脚無沙到石筒
春水溶溶遲日麗

扁舟蕩槳穩朝東

瞿唐峽

曾聞滌灑屹瞿唐
雪浪摧山勢獨當
我至韶融方二月
水平石出映斜陽

萬丈危屏水墨圖
江流帶窄映雲衢
莫怪波平瀾不倒
回狂灑灑一峯孤

井口鎮石牛詩

巨石如牛泝綠漪
象名為物本無知
休言神禹忘疏鑿

付與馮夷日筮笞

登六和塔

錢塘江上撐空塔塔外遙山翠作堆酒罷凭欄呼落日
水雲深處子陵臺

楊居士送眼藥

雲來雲去不干山花落花開春又還世事總歸明眼裏
皇帝帝伯恁催班

贈蘭道士

入水大虫出火龍一生看守贊神工知行例作等閒話
三尺兒童八十翁

艘人悞同行錢文作詩解之

胯下當年甚可羞身藏寶劍豈無謀暫時俯首依人去
贏取堂堂萬戶侯

又

自反仁而自反忠芳蓮開向火光中同君九萬搏扶去
薄盡浮雲出太空

文昌醮燈牌

牡丹枝上先春蕊

花洲牡丹冬開

翠杏壇邊未雨虹

杏壇見虹

知有

文章光萬丈鍾成佳氣滿黔中

丁家洲

水雲畱住覺無計杞菊催歸知有涯百丈黃昏牽月色
長洲灣處宿丁家

驚雷驟雨

今年春晚天氣寒桃李村村猶未吐
鼉擊雷聲送五更

江皋一陣催花雨

謁趙漕

山頭雲麥雜燒畝
桃李層層山半家
謳軋蠻歌聲滿峽
春生龍節爛光華

槎星爛照玉堂明
樓雪晴融白帝城
鷗狎不知菱蕩轉
漫隨瀼水泛春聲

文公桃李筍班中
問學心旌日夜東
時序催人煙水遠
臨流願借一帆風

社日過洞庭

社風吹雨楚江晴
舟葉輕飛過洞庭
萬里湖天天外水
君山一點望中青

固城湖

掌似平蕪遠際空
灣灣曲曲水相通
蘆汀蓼渚新秋裏
一段濃藍一段紅

有戶盡開楊影底
無軒不在水光中
濃藍染就秋空碧
只欠斜飛幾點鴻

溪平岸闊柳侵沙
潑潑遊鱗弄月華
柔櫓數聲深夜悄
漁人相喚隔蘆葭

涪州北巖書院別王東卿歸樂邑

雨前雨後山俱好
江瘦江肥水盡佳
一見論心無久近
休言眼底各天涯

別王叔儼

會得箇中無兩重
笑棚傀儡虛拈弄
水雲佳處看回來
少聽癡人多說夢

庚寅予自蓮蕩沂流全甫弟順流赴性善之招
舟行不相值有感

君意已馳涪水下我心猶望字川歸
只差一喚逍遙地
頓失幾年離別機

鄂渚大雪

橫隄疎柳嘯寒風吹起黃雲一色同
鸚鵡洲邊家十萬
曉來都在水晶宮

用趙教授韻謝程簽判春雪

看來川泳與雲飛道著兩間無隱微須信眼前都是易
若求高遠又還非

肖形可惜被形驅浪說懽娛未足娛心大如天無不有
何人剖蚌出明珠

和存子姪賦雪

花飛六出瑞方春不待剪裁開恁真稚子未諳天意好
漫山笑道玉成塵

和鄭季南喜雪

心閒無緒息紛紛看盡山頭護雪雲何事被他風月惱
詩壇隨分較功勳

玉樹瓊林萬壑竒從他烏鵲踏交枝卽瓶無酒辜心賞
更看敲門一首詩

避地身窮道不窮溪山好處句尤工水僊會得人心意
粧點茅茨畫軸中

青女輕拋萬寶粧梨花庭院冷無香欲題好語覩天巧
攪盡枯儒幾曲腸

天機流轉一回頭覽鏡何須空自羞雪盡草生春意好
人心不解漫間愁

木火盈爐破夜闌茅庵烘暖覺身安驕兒鼾寢僮眠却
些子天真不奈歡

曉起四山積雪

寒透重衾可折膠雨聲瑟瑟風颼颼安排雪句吟春曉
果見青山盡白頭

和王南運八陣磧

常山蛇勢少能明
治法還從陣法尋
先正後奇嚴自勝
堂堂真是武侯心

問趙存禮分竹

南牆曾記極幽尋
午簟涼鋪瑣碎金
小築江干無限暑
西窓乞與半簷陰

詠江南景物

幾千里地香秔綠
百億條溪高柳青
簇簇人煙富雞犬
太平原野喜初經

又

有水青陰濃覆地無山綠稼遠連天垂楊影裏風帆亂
知有回溪曲護田

又

幽深島嶼亂參差溪水迢遙橫復斜鵝鴨馴人不怕棹
閒隨小艇過蘆花

雞冠灘

灘邊奇石象雞冠上下舟人側目看但使此心存坦易

涉川履險亦非難

謝惠小鮮

得魚悵望白雲遠
憐我盤鮮久乏烹
恰喜新橙具雙美
金齏催趁玉絲羹

辛卯三月金沙道中

八九雨點青春老
三兩鶯聲綠蔭深
眼界無塵歸路穩
丹青難畫此中心

同存子姪造蓮蕩舟中作

此行為愛蕩中蓮萬里清風駕客船兩壁青山看不盡
舉頭天際有飛鷺

舟過磧江同存子姪論易

行行晚到磧江天閒把乾坤仔細論流水不知何處去
漁樵一飽兩忘言

和陳希舜濁醪二首又次為謀深遠之作一首
心地虛時來則受德新要似湯盤又濁醪妙理少人知
所以伯禹惡旨酒

幾年龍技學勤勞準擬豐餐嗜炙肴庖刃如新驚歲晚
亦無鼃鮓薦松醪

人心顯著道心微體認深時始得知若不沈潛格至理
雖多言語亦奚為

古木

古木撐空萬丈青鋪排峽險與江深濃嵐欲滴春煙暝
畫出騷人一片心

雲遊

走遍天涯地角來
流沙弱水接蓬萊
風輪空坐觀浮世

明鏡亭亭不用臺

一作處處瑤池白玉臺

和全父弟九華峯

舟子偏驚拍岸風
不論蜀艇與南舸
片帆催落梅根渚
天際池山出九峯

桑落洲望見廬山立雪一峯和全父弟韻

春風小立愛蓮時
倉卒狂吟壁上題
歲晚歸來無一事
好拚旬浹玩湓溪

新晴破雨浪猶激
暫卸蒲帆泊短灣
桑落洲前凝睇遠
尖天白雪是廬山

和全父弟巫山峯韻

巫峯十二最高頭
嵐色煙光翠欲流
舉首半空不可到
依稀絳闕與瓊樓

為清溪鄧茂林督工築室

欲話秋宵度兩三
被人閒與擔來擔
鳩工夜夜思籌北
命僕時時費指南

收弟姪書自中都

優優至道貴居寬休把浮名着意看身在九霄牢着步
些兒下了上應難

徐毅齋為東翔姪改字為存子

心酬萬事好深惟來不須迎去莫隨天理面前還仔細
夢醒休似夢酣時

巫山十二峯

真靈間氣巧蟠融天下應無似此峯笑殺襄王凡俗骨

妄生狂夢想山蹤

心與巫山異境融
危岑天際駭竒峯
蒼茫草木晴雲外
有似乘鸞跨鶴蹤

和峽州趙教授春後雪中惠酒

義理無窮歲月飛
有言難盡易精微
梅花帶雪春將半
龍戰爻中辯是非

多君不許利名驅
官冷瓢空日自娛
猶有小槽春夜滴
呼僮踏雪遣紅珠

諸公招飲不赴詩謝送酒

雙槳浮波日夜催
胥濤不到子陵臺
為憐摘菊空盈把
故遣鴟夷送酒來

甕甕飛蠓哦空檐
躍馬官塵日上船
故步明知渾失却
剡溪興盡不須前

端午自樂溫往墊江道中作

端午人間擬醉眠
旅情茅店獨蕭然
起尋詩句記佳節
萬里無雲月滿天

端平甲午踏槐前記夢中作

莫學寒蛩窻下吟
咄咄不作兩般聲
大千世界都聞了
管甚癡龍睡不驚

和全母弟題曼重三丈居

眼前皆易未嘗東
祇恐援弓逐過鴻
認得羲皇心上畫
簞瓢何必問顏空

包家園

衆綠爭齊敷夏蔭
老紅猶自駐春粧
閒紅浪綠俱休問

爭似巖松一色蒼

詠絲桐

地闊天寬人一般
琴心會得語言難
高山流水知音少
月白風清時自彈

下沱張西叔牡丹號奇品以詩寄花因用韻謝
天香吹落五雲來
滿眼浮花只浪開
國色不關朝得酒
粧臺漫飲紫金盃

主人骨相花難比
折贈雙花副麗辭
為報此花香第一

何須鉛粉巧粧禡



--	--	--	--	--	--	--	--